

Date – 15/07/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Kum 2022 atanga kumin April thla tawp thleng khan Mizoramah ruang 135 chhar a ni tawh.
2. Lawngtlai district bawrsap chuan Myanmar buaina avangin ramri-ah venhimna khauh zawk kalpui a nih tur thu a sawi.
3. Jammu & Kashmir-ah sipaiten ramri kan tum firfiak pathum an kaphlum .
4. European Football championship,Euro 2024 final nizana khelhzawh takah Spain-in England hnehin an champion.

<><><>

DEAD BODIES

Kum 2022 atanga kumin April thla tawp thleng khan Mizoramah mipa ruang chhar 126 leh hmeichhe ruang chhar 9, a vaiin 135, a awm tawh.

Police hotute hnen atanga thudawn danin ruang chhar zinga mipa 4 leh hmeichhia 2 chu tunge an nih hriat loh an ni a. Hemi chhung vek hian ruhro pahnih chhar a ni bawk. Kum 2022 khan mipa ruang chhar hi 60 an awm a, hmeichhe ruang chhar 3 an awm bawk a. Nikum chhung khan mipa ruang 46 leh hmeichhe ruang 5 chhar a ni a. Kumin January leh April inkar khan mipa ruang 20 leh hmeichhe ruang 1 chhar a ni. Kum 2022 atanga kumin April thla inkar chhung vek khan Mizoramah mahni intihlum 236 an awm a, an zinga 200 hi mipa an ni a, hmeichhia 36 an ni thung. Tunhma atang tawh khan mahni intihlum zingah hian hmeichhia ai-in mipa an tam zawk ziah niin Police hotute chuan an sawi.

Kum 2022 leh kumin May thla inkar chhung khan lirthei chesualah mi 266 an thi tawh a. Kum 2022 khan lirthei chetsual vanga thi an tam ber a mi 117 an ni a, nikum khan mi 96 thi-in kumin January atanga May thla tawp thleng khan mi 53 an thi tawh bawk a ni.

<><><>

MIZORAM GORKHA

Mizoram Gorkha Youth Association (Central) huaihawtin Gorkha ho zinga thu leh hla lama puipa bera an ngaih Adikavi Bhanubhakta Acharya champhaphak vawi 210-na ‘Bhanu Jayanti’ chu inrinni khan urhsun takin Vanapa Hall-ah an lawm a. He Ni lawmna hi Kolasib, Vairengte leh Bualpui ah te pawh MGYA Branch ten an buatsaih bawk a ni.

'Bhanu Jayanti' lawmna pui ber Aizawl Vanapa Hall-a neihah hian Director Hospital & Medical Education hnaa atanga pension Dr K K Chhetri chuan Gorkha thangtharte zingah mahni pianpui tawng thiam lo an awm tam chu a vei thu a sawi a, nu leh paten an fate chu khawi hmunah pawh awm sela mahni tawng an zir leh thiam tir chu an mawhphurhna lian berte zinga ami anih thu a sawi.

He hunah hian Gorkha hnam lam chi hrang hrang te entir a nih bakah an zirlai tithate chawimawina hun an hmang a ni bawk a. He Ni pual hian kar hmasa lam khan Nepali Middle School Khatla-ah Adikavi Bhanubhakta Acharya Thu leh Hla phuah te bakah thu leh hla lama tuimi ten an thuziak phochhuahna hun remchang tak leh thangthar ten Gorkha Hnam ziarang leh an pipu te an hnutchhiah Thu leh Hla lama an hausakna te puanzarna, chawimawina leh Kavi Gosthi(Seminar) chu neih a ni a, sikul naupang te tan Essay Writing leh Sketching intihsiakna te huaihawt a ni bawk.

Adikavi Bhanubhakta Acharya hi Nepal rama Tanahu District-a Chundi Ramgha khuaah kum 1814 khan a piang a. Puithiam chhungkua an nih avangin a hranpain sikul kal lo mahse a pa zirtirna avangin ziak leh chhiar lamah a thleng sang hle a. Thu leh Hla lamah hnutchhiah tam tak a nei a, khawvelin a hriat larna chhan ber chu Hindu Sakhaw Lehkhabu Thianghlim, 'Ramayana' Sanskrit tawng harsa tak atanga Nepali Tawng-a a lehlin avangin a ni. Amah hi Gorkha hnahthlak hnam hrang hrang te inkara inpumkhatna siamtu ah a ngaih a ni bawk a ni. Kum 1868 khan a thi a ni.

MGYA hi Mizoram-a Gorkha-te pawl lian ber niin 1976 khan din a ni a. MGYA hian Aizawl khawpui chhungah Branch 12 leh Aizawl pawn lamah Sub-Headquarter 1 (Kolasib) leh Branch 5 an nei a, member 4500 vel an awm mek a ni.



LAWNGTLAI LAW AND ORDER

Lawngtlai district bawrhsap Pu Cheemala Siva Gopal Reddy chuan Myanmar buaina avangin ramri-ah venhimna khauh zawk kalpui a nih tur thu a sawi.

Tun hnai a central Young Lai Association (CYLA) leh tlawmngai pawl dangte nen an inkawmhona-ah bawrhsap chuan tun dinhmunah Lawngtlai khawpui chhung ngeiah Rakhine State (Myanmar) mi leh sa an awm tih thawm a beng a thlen thu a sawi a. Pu Cheemala Siva Gopal Reddy chuan Assam Rifles nen hemi chungchang hi an sawiho tawh thu a tarlang a. Ramri khauh zawka venghim tura hmalak mek zel a nih thu sawiin, Police patrolling pawh zing leh khauh zawk a kalpui a ni, a ti. Tlawmngai pawlte ngenna anga 'Security Check Post' tam zawk siam chu thil pawimawh tak a ni tiin bawrhsap chuan thuneitu sang zawk hnena thlena, a tul ang zel a hmalak a ni ang a ti. Hetih lai hian CYLA hrulaitute chuan tun hnai-ah Myanmar ram Rakhine state atangin Arakan hel pawl mite ralthuam kengin Lawngtlai chhungah an lo lut niin an sawi bawk a ni.

Bawrhsap chuan mipui nitin mamawh bungraw phur lirtheite chu mipuite mamawh phurtu ber an nih avangin an kalna tur hmun an thlen ngei a

pawimawh hle a ti a. Mimal YLA hminga pawisa khawn duh vanga lirthei lo dang thin an awm ni a a hriat thu sawiin, hei hian YLA hming a tichhe thei dawn hle tiin CYLA chu pawisa khawn chingte zawng chhuak leh a tul anga hmalakpui turin a sawm a. A bik takin CYLA chu pawl lian ber an nih angin hmahruaitu ni turin a ngen a ni. Zalen taka sumdawna a kal pawh tul hle a ti a. Mizoram tuialhthei a lakna ber Assam lama lei chim vangin tuialhthei duh khawp hmuh a ni lo a, tunah chuan harsatna engmah awm tawh lo in Lawngtlai district mamawh zat tuialhthei a awm mek tih a tarlang.

Pu Reddy-a chuan Myanmar leh Bangladesh ram buai vangin Lawngtlai district- ah raltlan tam tak an lo lut tih a tarlang a. Ramri lo kan te chu raltlan an nih angin a theih chin chinah tanpui thin a ni, a ti a. Tlawmngai pawlte pawhin theihtawp an chhuah tih a hriatpui thu sawiin, fimkhur taka hmalak erawh a tul hle a ti. Ram leilung fate him leh zalen taka an awm chu thil pawimawh hmasa a nih thu tarlangin raltlan chungchangah ngaihtuahna thuk zawk neih a tul rualin tlawmngai pawlte nena lungrual taka thawhho pawh a tul hle a ti a. Lawngtlai dsitric chhunga raltlan awm mekte nawr chhuah tumna engmah a awm lo tih sawiin bawrhsap chuan a hranpaa sawrkar atanga raltlan tanpuina a awm si loh avangin raltlan tam zawk lo lut tur erawh district mipui-in an dawl zo dawn lo a, an dawl zawh tawh hriat a tul hle a ni, a ti.

<><><>

MISSING REFUGEE

Kar kalta laihawl vel atanga Bangladesh raltlan bo chu tun thlengin hmuh a la ni lo.

Police hotute hnen atanga thu dawn danin Bangladesh ram Chittagong Hill Tracts-a Bethel khaw mi, Vanlungngama (35) chu midang 33-te nen Lawngtlai district Damdep-2 khua-ah an rawn raltlan a. Mizoram Bawm Students' Association a central relief committee member Pu Lalramchhana Bawitlung sawi danin Vanlungngama hi raltlan mi 33-te rualin Damdep-2 khua hi a lo thleng ve ngei a. An vai hian BSF hovin Bangladesh ramri Kamtuli khua-ah an thawn kir leh a. Hemi hnu hian a awmna chin hriat a ni ta lo a ni. Damdep-2 khaw VC vice president Pu Sawma pawhin Vanlungngama hi an khua a lo lut zingah leh BSF-in an thawnkir zingah a tel ngei tih a sawi a. Amah leh mi 6 dangte hi Bangladesh-ah lutin thawnkir leh hlauvin ramhnuai-ah an tawm ni a an rin thu an sawi a. BSF ho avangin ramri hi a ralti a, zawng turin an lut thuk ngam lo ni-in an sawi.

<><><>

PRISON POPULATION

Mizoramah Jail tang mi 1,782 an awm a, lungin thenkhatah tang awm thei tur zat bituk ai a tam an awm mek thu Prison Department hotute chuan an sawi.

Prison Department chhinchiah danin vawiin thleng khan Central Jail mipa ward ah tang 844 an awm mek a. Central Women Jail ah tang mi 165 an awm mek bawk. Aizawl District Jail ah tang mi 110 an awm mek a, Lunglei Dist Jail ah mi 153, Siaha Dist Jail-ah tang 78, Champhai District Jail ah 162, Kolasib District Jail ah mi 114 an tang mek a, Lawngtlai District Jail ah tang

27, Serchhip District ah jail tang 53 leh Mamit District ah tang 76 an awm mek in, vawiin thlenga Mizorama jail tang belh khawm hi 1,782 a ni. He'ng lungin tang belh khawm zing ah hian kum tling lo tang mi 18 awmin, hmeichhia mi 218 tang an awm mek bawk a, a bak mi 1,546 te hi mipa an ni.

Tun dinhmunah hian Mizoram tanina tang awm thei tur bituk ai a tam tang an awm mek a. Central Jail Aizawl ah tang mi 438 awm thei tura ruahmanah jail a leta tam mi 844 tang an awm mek a, hmeichhe awmna Central Women Jail a tang dah theih zat hi mi 96 a nih laiin tun dinhmunah mi 164 tang an awm mek thung. Aizawl District Jail-ah mi 90 awm theihna -ah tang 112 an awm mek a. Mi 109 awmna tura ruahman Lunglei District jail-ah mi 156 an tang mek bawk. Tang 105 awmna tura ruahman Champhai district jail-ah mi 160 an tang mek a. Jail thenkhat a tawt viau laiin Siaha, Kolasib, Lawngtlai, Serchhip leh Mamit district Jail ah te hian tang thei tur zat bithliah aia tlem jail tang an awm ve thung a ni.

<><><>

J&K

Jammu & Kashmir-ah sipaiten ramri kan tum firfiak pathum an kaphlum. Thudawn danin firfiakte hian Kashmir hmar lam Kupwara district-a Keran Sector humchhung Line of Control (LoC) kana luhruk an tum chu sipaite hian an kaphlum a. Helai chhehvelah hian sipaiten anti-infiltration beihpui an thlak a. An inkahna hmunah hian silai leh ralthuam dang engemaw zat man tel a ni a. Firfiak ramri kan tum dapchhuah hna hi ngawrh taka thawh chhunzawm a ni..

<><><>

EURO 2023

European Football championship,Euro 2024 final nizana khelhzawh takah Spain-in goal 2 goal 1-a England hnehin an champion. Olympiastadion in Berlin, Germany-a final match hmuhnawm takah Spain tan Nicholas Williams leh Mikel Oyarzabal ten goal an thun a. England tan Cole Palmer chuan goal khat a thun ve bawk a ni. Heti hian Spain hian Euro title hi tum li la tawhin Euro-a champion ngun ber an ni ta a ni.

<><><>